

Auster quando pluuiosus. Auster quanto maior erit, tanto pluuiosior (saltem nobis) & diuturnior apparebit. Vnde quia finiens (ut diximus) ualidior est quam incipiens, idcirco pluuias sub finem uehementiores, quam initio fundit. Boreas contra: quapropter aquas paulatim colligit. 10

Morbi ab Austro diuturno. Austri si diu quidem spirabunt, ex Hippocratis observatione & praescripto, auditum hebetabunt, caput grauabunt, erunt caliginosi, pigri, & dissoluentes. 11

Austrinae constitutiones corpora humectant, frangunt & laxant: uertigines faciunt: oculis atque artubus difficilem motum praestant, & aluos lubricant. 12

Cur flante Austro, animal quoduis minus esurire testatum probatumque est. Quia calor ab eius flatu cutis poros aperiens, cum spiritu calidum internum (beneficio cuius coctiones & facultates aliae naturales perficiuntur) foras exhalare ac dissolui sinit. sed in calidis regionibus id locum habere potest, in nostris non item: nisi fortasse per aestatem. Ceterum quia (ut dictum est) Austri diuturni humiditate superflua corpora replent & pituita infarciunt, etiam id ipsum in paratis moliri possunt. 13

Haec uiderint agricolae. Austrum quae spectant arbores, decidua folia ante alias habere tradiderunt rerum agri scriptores. Adhaec per austrinos flatus fruges prius maturescere, quanquam celerius. 14

Auster